

# INUIT ATAQATIGIIT

## INATSISARTUNI



5. marts 2010  
20. august 2009

UPA 2010/22  
UKA 2009/43

Inatsisartut Suleriaasianni § 32 naapertorlugu aalajangiiffigisassatut siunnersuut imaattoq matumuuna saqqummiuppara:

**Inatsisartuni aalajangiiffigisassatut siunnersuutigaara, Nunatsinni naalakkersuisut Qallunaat Nunaanni naalakkersuisunut isumaqatigiinniarnermik aallartitsissasut, nunatsinni ikiaroorartup atugaaneranut tuniniarneqartarneratalu akiorniarneqarneranut, Qallunaat Nunaanni nunatsinnilu politiit suliniutinut annertusaanissamik suleqatigiinnissaat siunertaralugu.**

(Inatsisartunut ilaasortaq Olga P. Berthelsen Inuit Ataqatigiit)

### **Tunngavilersuut:**

Nalungisatsit 2003-mi misissuinermi paasineqarpoq, nunatsinni inuusuttut akornanni ikiaroorartumik atuineq annertoorujussuusoq. Ukiut maanna 6-7 missaasa qaangiunneranni inuiaqatigiit akornanni suli tusarsaavoq, inuusuttuaqqat akornanni ikiaroorartuq suli annertuumik atugaasoq. Ikiaroorartup inuusuttunit inuusussigaluttuinnartunit atugaanera annertuumik inuiaqatigiinnut erumatitsivoq. Tamanna tunngavigalugu Inuit Ataqatigiinni isumaqarpugut ikiaroorartup atugaanerata akiorneqarnissaa pimoorussamik siunissamullu ungasissumut atuuttussamik sulissutigineqartariaqartoq!

Inuit Ataqatigiinni isumaqarpugut suliniutinik siunissamut ungasissumut tunaartaqartunik pilersitsinngikkutta siunissami nunatsinni innuttaasut akornanni inuuniarnikkut ajornartorsiuteqarneq ullumikkornit suli annertunerulissasoq. Tamanna isiginngitsuusaarsinnaanngilarput, taamaattumillu nunatsinni naalakkersuinikkut aammalu inuiaqatigiit akornatsinni ikiaroorartumik akiuiniarneq sakkortuumik sulissutigisariaqarparput.

Politeeqarnerup nunatsinnit suli tiguneqarallannginnerani, ilaatigut ikiaroorartumut tunngassutillit suli Qallunaat Nunaannit akisussaaffigineqarput. Ukiut kingulliit ikiaroorartumut tunngatillugu suliassiissutigineqartartut eqqarsaatigissagaanni Inuit Ataqatigiinni isumaqarpugut suli tamakkununga tunngassutillit suliarineqarfissaminnit annikippallaartumik ingerlanneqartut.

Tamanna soorunami tunngaveqarsinnaavoq Qallunaat Nunaanni aammalumi nunatsinni politiinik sulissusanik ikippallaartunik peqarneq. Taamaakkaluarpalluunniit ajornartorsiut taama annertugisoq tamatumani pingaarnersiuneq kisimi apeqqutaasut isumaqarfigaarput.

Nunatsinni ajornartorsiuterpasuit imigassamik ikiaroorartumillu atuivallaarnermik ilaatigut pissuteqartut nalungilarput. Ajornartorsiuterpasuit qaangerniarutsigit siullerpaamik suliassarput tassaavoq ajornartorsiutit qiterisaasa sulissutiginnissaat.

Tamanna siunertaralugu siunnersuuteqarpunga nunatsinni ikiaroorartup atugaanerata aammalu tuniniarneqartarnerata annikillissarnissaa siunertaralugu suli maannamiit annertunerunerusumik suliniuteqartoqassasoq.